



REVISTA GALEGO-PORTUGUESA DE  
PSICOLOXÍA E EDUCACIÓN

Nºs 11-12 (Vol. 13) Ano 10º-2006 ISSN: 1138-1663

## O PAPEL DAS ATRIBUIZONS CAUSAIS E AS METAS ACADÉMICAS NOS PROCESOS DE APRENDIZAXE DO ALUMNADO GALEGO DE FORMACIÓN PROFESIONAL

Humberto MORÁN FRAGA\*

Alfonso BARCA LOZANO\*

Maria A. MUÑOZ CADAVID\*\*

\*Universidade da Coruña

\*\*Universidade de Santiago de Compostela

### RESUMO

As atribuizóns causais do rendimento, mediante as que o alunado outorga a certos tipos de causas a responsabilidade dos seus éxitos e fracasos, determinan en grande medida a motivación e a conduta de rendimento dos escolares. Pola sua parte, as *metas académicas* definen-se como conxuntos de crenzas, atribuizóns e afectos que regulan e dirixen a intención da conduta e en tal sentido implican formas diferentes de achegar-se, comprometer-se e responder ás actividades de logro académico. Unhas e outras veñen de ser estudiadas entre o alunado galego de formación profesional de grau medio (a etapa que, xunto ao bacharelato, conforma o ensino secundario pós-obrigatorio). Temos encontrado que as atribuizóns controlábeis e internas (como a capacidade e o esforzo) son os determinantes más significativos tanto do enfoque de aprendizaxe orientado ao significado e á comprensión como da procura de metas de aprendizaxe, o que á sua vez se corresponde coa obten-

ción dun rendimento xeralmente alto; mentres que as atribuizóns incontrolábeis e externas (como a sorte, a facilidade das matérias ou o profesorado) exercen unha importante influéncia na determinación do enfoque de aprendizaxe orientado á reprodución e da procura de metas de reforzo social, ao tempo que se corresponden coa obtención de baixos niveis de rendimento.

**PALABRAS CLAVE:** motivación académica, atribuizóns causais, metas académicas, procesos de aprendizaxe

### ABSTRACT

The causal attributions of academic performance, trough which secondary students concede a certain type of causes the liability for their successes and failures, determines to a great extent, students motivation and academic performance. On the side, the academic goals are defined as a set of beliefs, attributions and

---

#### Correos electrónicos:

\* humoranfra@edu.xunta.es

\*\* barca@udc.es

affections that control and lead behaviour purposes, it's in that sense, that it involves different approachable methos like commitment and respond to academic activities of achievement.

Causal attributions, as well as academic goals have been studied among technical colleges students Galicia and the conclusions shows, that inward causal attributions (as the capacity/ability and effort) are the most significative deterrents to a learning approach orientated to meaning and comprehension, as to the pursuit of objectives in learning that at the same time results in obtaining good academic performance. However, the causal attributions incontrollable (as luck, subjects and teacher's easiness) produce an important influence on learning approaches orientated to reproduction and the search for supportive social goals corresponding at the same time with low academic performance levels.

**KEY WORDS:** academic motivation, causal attributions, academic goals, learning processes.

## INTRODUCIÓN

Os procesos de **atribuición causal** constituyen un dos ámbitos de investigación que manifestan a relevancia dos aspectos motivacionais na aprendizaxe. Atribuir os resultados de éxito e de fracaso a certos tipos de causas determina en grande medida a motivación de logro e a conducta de rendimento dos individuos. As causas ás que as persoas en xeral, e o alunado en particular, atribuyen máis frecuentemente os resultados son a capacidade, o esforzo, a dificuldade da tarefa e a sorte. Sen embargo a importancia das atribuizóns non ven polas causas mesmas, senón pola sua caracterización percebida segundo as dimensións interna-externa, estable-iestable e controlábel-incontrolábel, e polas consecuencias afectivas e cognitivas que se derivan da atribuición realizada (Weiner, 1974; 1979).

Entre o alunado existen padróns ou tendencias más ou menos xeneralizadas para realizar determinados tipos de atribuizóns que á sua vez teñen efectos favorecedores ou ben inibidores sobre a motivación académica. O padrón más adaptativo e favorecedor consiste en atribuir o éxito a factores internos e o fracaso a factores ben internos ou externos, mentres que o padrón más inibidor da motivación implica atribuir o éxito a factores externos e o fracaso a factores internos e incontro-lábeis (González e Tourón, 1992).

Outro ámbito motivacional relevante ven constituído polas **metas académicas**, que reflecten intencións e afectos moduladores da conducta e implican formas diferentes de achegar-se, comprometer-se e responder ás actividades do logro académico (Dweck e Legget, 1988). A investigación ten enfatizado a diferenciación entre dous tipos básicos de metas (Dweck, 1986; Nichols, 1984; Ames, 1992):

- as metas de aprendizaxe (“centradas na tarefa” ou “de desafío”) significan para a persoa a procura do desenvolvimeto e a mellora da sua capacidade e revelan o seu interese pola adquisición de novas habilidades e maiores coñecimentos,
- as metas de rendimento (“centradas no eu” ou “de logro”) reflecten sobre todo o desexo do individuo de mostrar aos demás a propia competéncia, obter xuízos positivos sobre ela e evitar os negativos.

A concepción que o alunado posui sobre a intelixéncia e sobre as capacidades modula a importancia outorgada ao esforzo na procura de metas. Para o alunado que persegue metas de rendimento e entende que as capacidades son fixas e inmodificábeis o papel que xoga o esforzo é totalmente limitado, mentres que o alunado que procura metas de aprendizaxe e

posui unha concepción modificábel da intelixéncia entende que o esforzo pode realmente incrementar os niveis de capacidade e percebe que esta vai unida ao significado da aprendizaxe (Dweck, 1986).

Igualmente as consecuencias cognitivas, afectivas e condutuais dos resultados, especialmente nas reaccións ante o fracaso, son diferentes en función das metas perseguidas. O alunado que persegue metas de rendimento interpreta o fracaso como falta de competéncia, ten sentimento de incapacidade e afectos negativos con relación ás tarefas. Isto leva a unha falta de implicación na aprendizaxe e a un descenso na persisténcia e no uso de estratéxias adaptativas. Contrariamente, o alunado que procura metas de aprendizaxe reaccioná ante o fracaso buscando estratéxias de atorregulación que permitan solucionar as dificuldares e incrementando o esforzo e a dedicación nas tarefas (Dweck e Legget, 1988).

A partir das evidéncias aportadas por Hayamizu e Weiner (1991) abriu-se paso a consideración de tres categorías: ademais das metas de aprendizaxe estableceu-se a diferenciación de dous tipos de metas de rendimento, denominadas metas de reforzo social e metas de logro. As metas de reforzo social asocian-se co alunado cuxo propósito é obter a aprovación de pais, profesores e iguais e evitar o seu rexeitamento, mentres que as metas de logro se asocian coa intención de obter bons resultados académicos e avanzar nos estudos (Mascarenhas, Almeida e Barca, 2005).

## MÉTODO E PROCEDIMENTOS

### OBXECTIVOS

Este estudio pretende explorar as atribuizóns causais que realiza e as metas

académicas que persegue o alunado galego de formación profesional. Tamén se pretende dilucidar entre un grupo de variábeis presáxio o papel das atribuizóns como determinantes das metas académicas e finalmente determinar a influencia de unhas e outras sobre o rendimento alcanzado polo alunado.

### AMOSTRA

A Formación Profesional Específica comprende un conxunto de *Ciclos Formativos* orientados á adquisición de *competéncias profesionais* que permitan desempeñar papeis e actividades características dos diferentes ámbitos laborais. Estes ciclos agrupan-se en *Familias Profesionais* (actualmente vinte e duas) e o programa formativo organiza-se en *Módulos Profesionais* de contidos teórico-práticos. Na estrutura xeral do sistema educativo estes ciclos formativos fan parte do ensino pós-obrigatorio e están ordenados en dous niveis ou graus: ciclos de F.P. de *Grau Médio* e ciclos de F.P. de *Grau Superior*. Como norma xeral, o acceso à F.P. de grau medio requere o título de graduado en educación secundaria e conduce á obtención dun título de *Técnico*. Pola súa parte, o acceso à F.P. de grau superior requere o título de bacharelato e conduce á obtención dun título de *Técnico Superior* (Xunta de Galicia, 2002).

A amostra deste estudio está formada por 771 alumnos/as da *formación profesional de grau medio* pertencentes ás catro familias profesionais máis representativas e procedentes de vinte e cinco centros públicos galegos. Nas seguintes táboas recollen-se as características básicas da citada amostra.

**Táboa 1.** Alunado da amostra: distribución por Xéneros

Xénero	Frecuénzia	%	% acumulada
Feminino	309	40,1	40,1
Masculino	462	59,9	100,0
Total	771	100,0	

**Táboa 2.** Alunado da amostra: distribución por Idades

	Idade	Frecuénzia	%	% válida	% acumulada
Válidos	15 anos	2	,3	,3	,3
	16 anos	69	8,9	9,0	9,3
	17 anos	186	24,1	24,3	33,5
	18 anos	231	30,0	30,1	63,6
	19 anos	141	18,3	18,4	82,0
	20 anos	70	9,1	9,1	91,1
	21 anos	37	4,8	4,8	96,0
	22 anos	16	2,1	2,1	98,0
	23 ou máis anos	15	1,9	2,0	100,0
	Total	767	99,5	100,0	
Perdidos	Sistema	4	,5		
	Total	771	100,0		

**Táboa 3.** Alunado da amostra: distribución por Famílias profesionais

Familia profesional	Frecuénzia	%	% acumulada
Administración	206	26,7	26,7
Electricidade-Electrónica	246	31,9	58,6
Mantenimento de Veículos	162	21,0	79,6
Sanidade	157	20,4	100,0
Total	771	100,0	

## **INSTRUMENTOS DE AVALIACIÓN E MEDIDA**

A Subescala EACM (*Avaliación de atribuizóns causais e multidimensionais*) permite identificar até sete dimensións en función da causa atribuída e da sua refe-

rência ao alto ou baixo rendemento académico (sorte, facilidade das matérias, profesorado, capacidade, esforzo, ...).

A Subescala CEPA (*Cuestionario de avaliación dos procesos de aprendizaxe*)

constitui unha adaptación do LPQ deseñado por Biggs (1987). Explora diferentes motivos e estratéxias que o alunado pon en marcha na realización habitual das actividades escolares e permite identificar tipos básicos de enfoques de aprendizaxe (superficial, profundo, de logro). Xunto coa anterior conforma o *Sistema Integrado de Avaliación de Atribuizóns Causais e Procesos de Aprendizaxe (SIA-CEPA)*, elaborado na Universidade da Coruña por Barca (2000).

O *Cuestionario de Dados Persoais, Familiares e Académicos (CDPFA)*, elaborado na Universidade da Coruña (Barca et al., 1999; Barca e Peralbo, 2002) está destinado á exploración de diversas características de tipo material, relacional e motivacional referidas aos ámbitos persoal, familiar e escolar, ademais de recoller datos persoais e académicos básicos. Inclui unha subescala específica de *Metas académicas*.

A *Escala de Avaliación do Autoconceito para Adolescentes (ESAVA-2)* constitui unha adaptación do *Self Description Questionnaire (SDQ-II)* de Marsh realizada a partir da versión española (ESEA-2) de J.C. Núñez (González-Pienda e Núñez, 1992).

## TÉCNICAS DE ANÁLISE

A exploración das atribuizóns causais e das metas académicas, así como a descripción xeral das dimensións que se contemplan nos cuestonarios escollidos como instrumentos de avaliación, son desenvolvidas mediante a técnica da *análise factorial exploratoria*, método de *componentes principais*, con *rotación varimax* e coa inclusión dun criterio que limita as saturacións factoriais para considerar eliminando as cargas inferiores a,30.

Para coñecer os efectos das variábeis presáxio sobre as metas e os de aquelas e estas sobre o rendimento académico utilizamos a *regresión múltipla*, que se basea no planeamento dunha ecuación que maximice a predición dunha variábel concreta (por exemplo, o rendimento) determinando o mellor agregado ponderado dunha serie de variábeis preditoras. Neste estudo a inclusión das variábeis no proceso realiza-se mediante o método de *pasos sucesivos*, o que significa que as variábeis entran na ecuación unha por unha segundo o seu grau de contribución á mesma e comezando con aquela que máis alta correlación mantén co criterio.

## RESULTADOS E CONCLUSIÓNS

### Caracterización das atribuizóns e as metas entre o alunado da amostra

A exploración das *atribuizóns causais do rendimento* realizou-se mediante o cuestonário EACM e ficaron concretadas nas seguintes seis variábeis:

- atribuizón à sorte e à facilidade das matérias, do rendimento (SFM-R)
- atribuizón ao profesorado, do baixo rendimento (PF-BR)
- atribuizón ao escaso esforzo, do baixo rendimento (EE-BR)
- atribuizón à alta capacidade, do alto rendimento (AC-AR)
- atribuizón à escasa capacidade, do baixo rendimento (EC-BR)
- atribuizón ao alto esforzo, do alto rendimento (AE-AR)

Coa finalidade de completar a validación da nosa estrutura factorial, os seis

factores foron submetidos à análise de segunda orden obtendo unha solución de dous componentes que explican o 49 % da varianza total (vid. *Táboa 4*):

- o factor I agrupa as *Atribuizóns Incontrolábeis e Externas*: sorte e facili-

dade das matérias (SFM-R), profesorado (PF-BR) e escasa capacidade (EC-BR).

- o factor II reune as *Atribuizóns Controlábeis e Internas* (alto esforzo (AE-AR), escaso esforzo (EE-BR) e alta capacidade (AC-AR)).

**Táboa 4.** EACM: Estrutura factorial de 2<sup>a</sup> orden no alunado da amostra

Factores 1 <sup>a</sup> orden	Comunalidades	Factores	
		I	II
SFM-R: Atrib. à Sorte e à Facilidade das matérias, do Rendimento	,594	,770	
PF-BR: Atrib. ao Profesorado, do Baixo Rendimento	,507	,712	
EC-BR: Atrib. à Escasa Capacidade, do Baixo Rendimento	,421	,649	
AE-AR: Atrib. ao Alto Esforzo, do Alto Rendimento	,572		,756
EE-BR: Atrib. ao Escaso Esforzo, do Baixo Rendimento	,442		,646
AC-AR: Atrib. à Alta Capacidade, do Alto Rendimento	,417		,617
% da Varianza		Factores	26,445
		Total	49,221
Fiabilidade (coeficiente alpha)		Factores	,5568
		Total	,6766

Observou-se que entre o alunado da amostra as atribuizóns que obteñen menor pontuación, e que portanto resultan menos frecuentes, son a *atribuizón à baixa capacidade do baixo rendimento* e a *atribuizón à sorte e à facilidade das matérias do rendimento*. En consecuencia, as *atribuizóns incontrolábeis e externas* obteñen menor pontuación media que as *controlábeis e internas*.

Con relación ás *metas académicas* do alunado, e mediante a subescala correspondente do CDPFA, obtivo-se con clari-

dade unha solución factorial de tres componentes, como se recolle na Táboa 5, que explican o 49 % da varianza total e que reproducen os tres tipos de metas encontradas por Hayamizu e Weiner (1991):

- as *metas de aprendizaxe* expresan motivación intrínseca, interese polos contidos, envolvemento persoal nas actividades e desexo de incrementar a propia competencia.

- as *metas de reforzo social* orientan-se a conseguir o recoñecimento e a aprova-

ción dos compañeros/as, pais ou profesorado, ao tempo que se acompañan frecuentemente de temor ao fracaso. (Son as menos frecuentes no alunado da amostra).

- as *metas de logro* tamén revelan motivación extrínseca, mais neste caso orientada à obtención do éxito escolar e à consecución dunha boa posición social no futuro.

**Táboa 5.** CDPFA: Estrutura factorial da subescala “Metas académicas do alunado”

Item	Comunalidades	Factores		
		I	II	III
64. Esfórzome nos meus estudos porque quero ser valorado/a e alabado/a por parte da miña nai e meu pai.	,634	,795		
63. Esfórzome nos meus estudos porque quero que todos/as vexan o intelixente que son.	,639	,793		
65. Esfórzome nos meus estudos porque quero obter algúnsa recompensa por parte da miña nai e meu pai.	,482	,684		
62. Esfórzome nos meus estudos porque quero ser valorado/a polos meus amigos e amigas.	487	,664		
61. Esfórzome nos meus estudos porque quero ser o que mellor notas saque.	,397	,561		
70. Esfórzome nos meus estudos para evitar consecuencias negativas como rifas, amoestacións, disgustos ou outras situacións desagradables na familia.	,268	,444		
58. Esfórzome nos meus estudos porque me resulta interesante ver como o que sei me serve para aprender coas novas.	,646		,802	
57. Esfórzome nos meus estudos porque de sexo aumentar os meus coñecementos e competencia.	,565		,745	
59. Esfórzome nos meus estudos porque me gusta e interesa o que estou estudiando.	,525		,721	
60. Esfórzome nos meus estudos porque me sinto moi bien cando resolvo correctamente as tarefas ou o meu traballo.	,505		,692	
67. Esfórzome nos meus estudos porque quero conseguir un bon traballo no futuro.	,592			,755
66. Esfórzome nos meus estudos porque quero finalizar ben os meus estudos actuais.	,463			,629
69. Esfórzome nos meus estudos porque quero conseguir unha boa posición social no futuro.	,411			,594
68. Esfórzome nos meus estudos porque non me gustaría estar nas listas do paro.	,333			,572
% da Varianza		Para cada factor	23,532	15,537
		Total	49,625	10,555

### As atribuizóns causais e os determinantes das metas académicas

En relación coas metas académicas, e levando en conta os modelos teóricos e

empíricos de referencia, interesa especialmente coñecer os determinantes das *metas de aprendizaxe*, xa que son estas as que concitan a motivación que denominamos xenericamente intrínseca e implican

o gosto pola aprendizaxe e o desexo de incrementar a competéncia (Dweck, 1986).

Os resultados da análise de regresión das variábeis presáxio sobre as metas de aprendizaxe, recollidos na *Táboa 6*, basean-se nunha ecuación que incorpora nove variábeis e explica o 21,1 % da

varianza. As *atribuizóns controlábeis e internas* –factor de segunda orden que agrupa as atribuizóns á alta capacidade do alto rendimento, ao alto esforzo do alto rendimento e ao escaso esforzo do baixo rendimento– aparecen no primeiro lugar con un 7,6 % de varianza explicada e un coeficiente de determinación positiva  $B = ,279$ .

**Táboa 6.** Resultados da análise de regresión múltipla (pasos sucesivos).

V.I.: Escalas CDPFA, EACM e ESAVA-2

V.D.: Metas de aprendizaxe

Varianza total explicada: 21,1 %

Modelo	Variábeis preditoras	R	$R^2$	$R^2$ corrixida	Erro típ. da estimación	Cambio en $R^2$	Cambio en F	Beta	Signif.
1	Atribuizóns Controlábeis e internas	,279	,078	,076	,68932	,078	60,934	,279	,000
2	Satisfacción familiar cos resultados	,342	,117	,115	,67482	,040	32,452	,201	,000
3	Confianza familiar nas capacidades e esforzo	,385	,148	,145	,66337	,031	26,158	,178	,000
4	Autonomía nas decisións sobre estudo	,405	,164	,159	,65767	,016	13,572	,132	,000
5	Aparéncia Física	,420	,176	,171	,65315	,013	11,011	-,114	,001
6	Autoconceito Académico	,436	,190	,183	,64833	,013	11,765	,129	,001
7	Colaboración familiar co centro escolar	,446	,199	,192	,64492	,010	8,624	,100	,003
8	Interese TV e literatura galegas	,455	,207	,198	,64240	,007	6,646	,088	,010
9	Atribuizón ao Alto Esforzo do Alto Rendimento	,460	,211	,201	,64101	,005	4,101	,103	,043

A continuación unen-se á ecuación con relevante grau de importáncia duas variábeis referidas ás atitudes familiares: *satisfacción familiar cos resultados* (4 % da varianza;  $B = ,201$ ) e *confianza familiar nas capacidades e esforzo* (3,1 % da varianza;  $B = ,178$ ). E xa con menor importáncia podemos observar a influéncia tamén positiva da *autonomía nas decisións sobre o estudio* (1,6 % da varianza;  $B = ,132$ ) e a determinación de duas dimensíons do autoconceito que mostran incrementos da varianza seme-

llantes, ainda que o sentido da sua influéncia é diferente: a *aparéncia física* influi negativamente sobre a adopción de metas de aprendizaxe (1,3 % da varianza;  $B = -,114$ ) mentres que a influéncia do autoconceito académico é positiva (1,3 % da varianza;  $B = ,129$ ).

Observe-se que as tres variábeis restantes posuen xa escaso poder predictivo –en conxunto supoñen un incremento apenas superior ao 2 % da varianza explicada– polo que pode-

mos concluir que o maior poder preditivo na determinación das metas de aprendizaxe se sitúa na tendéncia do alunado a atribuir o rendimento a causas que considera baixo o seu control e na percepción de que a sua familia se sente satisfeita cos resultados e que confia nas suas capacidades e no seu esforzo para levar adiante os estudos.

Os resultados da análise realizada para as *metas de reforzo social* aparecen recollidos na Táboa 7, onde podemos apreciar que a primeira variábel incorporada na ecuación de regresión se identifica coas *atribuizóns incontrolábeis e externas* –o factor de segunda orden que agrupa as atribuizóns à sorte e à facilidade das matérias do rendimento, ao profesorado do baixo rendimento e à baixa capacidade do baixo rendimento– que explica o 8,9 % da varianza e mostra determinación positiva sobre a variábel dependente ( $B = ,299$ ). Une-se seguidamente à ecuación con un peso tamén importante a *atribuizón à alta capacidade do alto rendimento*, aportando un incremento do 5,7 % na varianza explicada e mostrando igualmente a sua determinación positiva sobre a variábel dependente ( $B = ,240$ ). Ainda que este tipo de atribuizón se inclui factorialmente nas atribuizóns controlábeis e internas, a sua notória presenza agora xunto ás atribuizóns incontrolábeis e externas non debe significar un problema para inter-

pretar adecuadamente esta influéncia sobre a opción polas metas de reforzo social. Ao contrario, atribuir os bons resultados á posesión dunha alta capacidade entra en clara sintonía coa procura da aprobación dos demais que caracteriza este tipo de metas. Unha lóxica interpretativa semellante é a que debemos aplicar para a seguinte variábel que se incorpora con un 4,3 % da varianza explicada e un valor  $B = ,207$ . Trata-se dos *reforzos familiares do rendimento e non comparacóns*, que recollen especialmente os hábitos familiares de eloxiar e recompensar de forma explícita os esforzos e os bons resultados do alumno/a.

Observamos que aparecen a continuación catro preditores que mostran ainda certa releváncia, mais notoriamente inferior, na determinación positiva das metas de reforzo social: a dimensión do autoconceito *relación con iguais do sexo oposto* (1,4 % da varianza;  $B = ,121$ ), a *colaboración familiar co centro escolar* (1,3 % da varianza;  $B = ,114$ ), as *expectativas familiares sobre o futuro académico e profesional* (1,1 % da varianza;  $B = ,107$ ) e a *concepción institucional do fracaso escolar* (1,1 % da varianza;  $B = ,108$ ). Finalmente, a influéncia das duas últimas variábeis recollidas, que conxuntamente só explican o 1,4 % da varianza, debe ser considerada xa de escasa importancia e con un valor predictivo praticamente residual.

**Táboa 7.** Resultados da análise de regresión múltipla (pasos sucesivos).

V.I.: Escalas CDPFA, EACM e ESAVA-2

V.D.: Metas de reforzo social

Varianza total explicada: 25,2 %

Modelo	Variábeis preditoras	R	R <sup>2</sup>	R <sup>2</sup> corrixida	Erro típ. da estimación	Cambio en R <sup>2</sup>	Cambio en F	Beta	Signif.
1	Atribuizóns Incontrolábeis e externas	,299	,089	,088	,86945	,089	71,045	,299	,000
2	Atribuizón à Alta Capacidade, do Alto Rendimento	,383	,147	,144	,84228	,057	48,398	,240	,000
3	Reforzos familiares do rendimento e non comparacións	,435	,189	,186	,82152	,043	37,934	,207	,000
4	Relación con Iguais do Sexo Oposto	,451	,203	,199	,81508	,014	12,455	,121	,000
5	Colaboración familiar co centro escolar	,465	,216	,210	,80910	,013	11,677	,114	,001
6	Expectativas familiares sobre o futuro académico e profesional	,477	,227	,221	,80381	,011	10,494	,107	,001
7	Concepción institucional do fracaso	,488	,238	,230	,79877	,011	10,083	,108	,002
8	Autoconceito Privado Xeral	,496	,246	,238	,79489	,008	8,021	-,099	,005
9	Atribuizón ao Alto Esforzo, do Alto Rendimento	,502	,252	,243	,79227	,006	5,742	,082	,017

En conclusión, podemos afirmar que o poder predictivo na determinación das metas de reforzo social ven fundamentalmente condicionado pola tendéncia do alunado a atribuir os resultados do seu rendimento a causas externas ou sobre as que non posui control, tamén á sua capacidade cando os resultados son bons, e pola práctica habitual por parte da familia de recompensar de forma explícita o esforzo e o bon rendimento do alumno/a.

Con respeito ás *metas de logro* a análise ten ofrecido resultados más modestos en canto á sua capacidade predictiva global ademais de mostrar unha auséncia

case total das atribuizóns causais como determinantes deste tipo de metas.

### As atribuizóns, as metas e o rendimento académico

Tomando como variábeis independentes os seis factores primarios e os dous factores de segunda orden relativos ás **atribuizóns causais**, a análise realizada ofrece un resultado baseado nunha ecuación de regresión que únicamente inclui unha variábel (vid. *Táboa 8*). As *atribuizóns incontrolábeis e externas* explican asi o 3,2 % da varianza e mostran unha discreta, ainda que significativa, influéncia negativa sobre o rendimento ( $B = -,178$ ).

**Táboa 8.** Resultados da análise de regresión múltipla (pasos sucesivos).

V.I.: Atribuizóns causais (EACM)

V.D.: Cualificación Numérica (Rendimento actual)

Varianza total explicada: 3,2 %

Modelo	Variábeis preditoras	R	R <sup>2</sup>	R <sup>2</sup> corrida	Erro típ. da estimación	Cambio en R <sup>2</sup>	Cambio en F	Beta	Signif.
1	Atribuizóns Incontrolábeis e externas	,178	,032	,030	1,35842	,032	21,971	-,178	,000

As *atribuizóns incontrolábeis e externas* constituen o factor de segunda orden que agrupa a *atribuizón à sorte e à facilidade das tarefas do rendimento*, a *atribuizón ao profesorado do baixo rendimento* e a *atribuizón à baixa capacidade do baixo rendimento*, e en tal sentido expresan a inibición do alunado para asumir responsabilidade persoal en relación cos resultados que obtén. Esta determinación negativa sobre o rendimento que encontramos é coincidente con resultados anteriores (González-Pienda e Núñez, 1994; Barca e Peralbo, 2002; Mascarenhas, 2003), se ben unha correspondente determinación positiva e significativa por parte das atribuizóns controlábeis e internas non pudo ser constatada.

Polo que respecta aos efectos das *metas académicas* sobre o rendimento, os resultados mostran que a ecuación de regresión inclui os tres tipos de metas considerados e que isto se traduce nun 4,4 % de varian-

za total explicada (vid. *Táboa 9*). Convén salientar que aparecen en primeiro lugar as *metas de aprendizaxe* –que implican envolvimento intrínseco nas tarefas e desexo de incrementar a competéncia– con un 2,9 % da varianza e valor de B = ,171, mostrando portanto unha determinación positiva do rendimento. Podemos tamén observar que a incorporación como segunda variábel das *metas de reforzo social* –que implican a procura da aprobación social e a evitación do fracaso– supón un incremento do 0,7 % da varianza e mostra que a sua determinación sobre o rendimento ten sentido negativo (B = -,082). En terceiro lugar incorporan-se igualmente as *metas de logro* –que implican a procura do éxito escolar e a consecución dunha boa posición social futura– con unha proporción da varianza do 0,8 % e mostrando, como as metas de aprendizaxe, unha determinación positiva sobre o rendimento (B = ,096).

**Táboa 9.** Resultados da análise de regresión múltipla (pasos sucesivos).

V.I.: Escala CDPFA, Subescala Metas académicas

V.D.: Cualificación Numérica (Rendimento actual)

Varianza total explicada: 4,4 %

Modelo	Variábeis preditoras	R	R <sup>2</sup>	R <sup>2</sup> corrida	Erro típ. da estimación	Cambio en R <sup>2</sup>	Cambio en F	Beta	Signif.
1	Metas de aprendizaxe	,171	,029	,028	1,35749	,029	20,174	,171	,000
2	Metas de reforzo social	,189	,036	,033	1,35387	,007	4,594	-,082	,032
3	Metas de logro	,210	,044	,040	1,34895	,008	5,897	,096	,015

Concluimos portanto que, a pesar de mostrar conxuntamente un poder preditivo discreto, varios aspectos resultan aquí relevantes. Por un lado, os tres tipos de metas considerados inicialmente aparecen incluidos na ecuación de regresión que, ademais, outorga a maior importancia às metas de aprendizaxe. Por outro lado, son especialmente as metas de aprendizaxe, e en menor medida as metas de logro, as que mostran influencia positiva sobre o rendimento, mentres que as metas de reforzo social revelan inequivocadamente a sua influencia negativa.


## SÍNTSE E CONCLUSIÓNS

Con respecto ás *metas de aprendizaxe* –que significan motivación intrínseca e desexo de incrementar a competéncia– temos encontrado un conxunto de determinantes, recollidos na *Figura 1*, entre os que destacan as *atribuizóns controlábeis e internas*, a *satisfacción familiar cos resultados* e a *confianza familiar nas capacidades e esforzo*. Tal determinación significa nesta situación que o alunado se sente responsábel do seu rendimento, pois

fai atribuizóns a causas internas que considera baixo o seu control, e que percebe na sua familia atitudes que evidéncian confianza nas suas posibilidades e satisfacción coa sua actuación. Nun segundo plano da determinación das *metas de aprendizaxe* tamén hai que levar en conta a influencia positiva da disponibilidade de *autonomía para tomar decisións* relativas á organización das tarefas de estudo e das actividades extraescolares, a posesión dun bon nivel de *autoconceito académico*, e a influencia negativa da dimensión do autoconceito *aparéncia física*.

Así, a determinación da preferéncia do alunado polas *metas de aprendizaxe* resume-se en atribuir os resultados a causas internas e controlábeis, con especial referencia ao esforzo, perceber que a familia está satisfeita cos resultados, que ten confianza nas suas posibilidades e que mantién contactos co centro, dispor de certa autonomía para organizar as actividades de estudo, posuir alto autoconceito académico, ter interese pola TV e a literatura galegas e non dispor de autopercepcións elevadas sobre a aparéncia física.


**Figura 1.** Variábeis determinantes das Metas de Aprendizaxe, no alunado galego de formación profesional



As *metas de reforzo social* –caracterizadas pola procura da aprobación dos demás e a evitación do fracaso– aparecen determinadas polos factores que se recollen na Figura 2., entre os que sobresaen as *atribuizóns incontrolábeis e externas*, a *atribuizón á alta capacidade do alto rendimento* e os *reforzos familiares do rendimento e non comparacóns*. A relevancia destes aspectos significa que o maior peso determinante recaí na consideración por parte do alunado dunha baixa responsabilidade persoal en rela-

ción cos resultados que obtén e no importante papel que xogan as recompensas, loubanzas e demás reforzos que os pais e a familia outorgan explicitamente ao alumno/a polo seu rendimento. En forma más moderada tamén exercen a sua influéncia sobre as *metas de reforzo social* a dimensión do autoconceito *relación con iguais do sexo oposto* –as auto-percepcións do alumno/a sobre as suas habilidades arredor deste aspecto– e a existéncia de contactos e *colaboración familiar co centro escolar*.

**Figura 2.** Variábeis determinantes das Metas de Reforzo Social, no alunado galego de formación profesional



Así pois, a preferéncia neste alunado polas *metas de reforzo social* ven determinada por atribuir os resultados fundamentalmente a causas externas ou á capacidade, ser recompensado polo rendimento, ter altas autopercpcións sobre as habilidades para iniciar e manter relacións cos iguais do sexo oposto, perceber que a familia mantén contactos co centro e que ten expectativas favorábeis sobre o futuro.

Os efectos das atribuizóns causais sobre o rendimento académico indican-nos que a tendéncia a *atribuir* os resultados a causas *incontrolábeis e externas*, que revela unha baixa asunción de responsabilidade persoal, incide de forma negativa sobre o rendimento. No entanto, non foi posibel achar confirmación da determinación positiva das atribuizóns controlábeis e internas.

O ámbito das metas académicas reflecte de forma consistente a determinación positiva que sobre o rendimento exercen as *metas de aprendizaxe*, caracterizadas pola motivación intrínseca que anima a actuación do alunado, polo seu envolvemento na realización das tarefas e o desexo implícito de mellorar a sua competéncia. Inversamente, a determinación sobre o rendimento é negativa no caso das *metas de reforzo social*, que fundamentalmente buscan o recoñecimento e a aprobación dos demás –compañeiros, profesorado ou familia– e xeralmente están dominadas pola sombra do temor ao fracaso, o medo a fallar ou a non facé-lo ben.

Pola sua parte as *metas de logro* -que se orientan a levar adiante e rematar con éxito os estudos coa intención de conseguir no futuro unha boa posición social- mostran entre o alunado de formación profesional un carácter híbrido con certas características próximas ás metas de reforzo social mentres que outras son más semellantes ás metas de aprendizaxe, como neste caso en que exercen unha influéncia positiva sobre o rendimento.

## REFERÉNCIAS

- Ames, C. (1992). Classrooms: Goals, structures and student motivation. *Journal of Educational Psychology, 84*, 261-271.
- Barca, A. (2000). *Escala SIACEPA. Sistema Integrado de Evaluación de Atribuciones Causales y Procesos de Aprendizaje. Técnicas de intervención psicoeducativa. (Educación secundaria)*. Manual. A Coruña: Publicacións e Monografías da Revista Galego-Portuguesa de Psicoloxía e Educación.
- Barca, A., Brenlla, J. C., Santamaría, S. e González, A. (1999). Estrategias y enfoques de aprendizaje, contextos familiares, y rendimiento académico en el alumnado de educación secundaria: indicadores para un análisis causal. *Revista Galego-Portuguesa de Psicoloxía e Educación, 4* (3), 229-272.
- Barca, A. e Peralbo, M. (Dirs.) (2002). *Los contextos de aprendizaje y desarrollo en la educación secundaria obligatoria (ESO): perspectivas de intervención psicoeducativa sobre el fracaso escolar en la Comunidad Autónoma de Galicia. (Proyecto Feder/Esog-Galicia: IFD97-0283). Memoria/Informe final (3 vols.)*. A Coruña: Universidade da Coruña/Ministerio de Ciencia y Tecnología.
- Biggs, J. B. (1987). *Learning Process Questionnaire (LPQ)*. Manual. Hawthorn, Vic.: Australian Council for Educational Research.
- Dweck, C. S. (1986). Motivational processes affecting learning. *American Psychologist, 41*, 1049-1048.
- Dweck, C. S. e Leggett, E. (1988). A social-cognitive approach to motivation and personality. *Psychological Review, 95* (2), 256-273.
- González, M. C. e Tourón, J. (1992). *Autoconcepto y rendimiento escolar. Sus implicaciones en la motivación y en la autorregulación del aprendizaje*. Pamplona: EUNSA.
- González-Pienda, J. A. e Núñez, J. C. (1992). Características estructurales y psicométricas del Self Description Questionnaire. *Revista Galega de Psicopedagogia, 5* (6-7), 133-168.
- Hayamizu, T. e Weiner, B. (1991). A test of Dweck's model of achievement goals as related to perceptions of ability. *Journal of Experimental Education, 59*, 226-234.

- Mascarenhas, S. A. N. (2003). *Avaliação dos processos, estilos e abordagens de aprendizagem dos alunos do Ensino Médio do estado de Rondônia (Brasil)*. Tese de doutoramento. Universidade da Coruña.
- Mascarenhas, S., Almeida, L. e A. Barca (2005). Estilos atribucionais e rendimiento a académico: um estudio con estudiantes brasileiros de ensino medio. *Revista Galego-Portuguesa de Psicoloxia e Educación*, 10 (vol 12), 221-229.
- Nicholls, J. G. (1984). Achievement motivation: conceptions of ability, subjective experience, task choice and performance. *Psychological Review*, 91, 328-346.
- Weiner, B. (1974). *Achievement motivation and attribution theory*. Morristown, NJ: General Learning Press.
- Weiner, B. (1979). A theory of motivation for some classroom experiences. *Journal of educational Psychology*, 71, 3-25.
- Xunta de Galicia (2002). *Guía do ensino non universitario en Galicia, 2002-2003*. Santiago de Compostela: Consellaría de Educación e Ordenación Universitaria.